


KRISTMAS-NI GOLPORANG



Kan-dikgipa Golporang | Canningham K Marak

PROLOGUE

Anga “Krismasni Golporang” Title-ko ra’e kan’dikgipa golporangko chapa ka’atenga. Krismas aro Bilsu Gital sokbaon ua somoina ka’srok soanide gimik manigiparangna ka’sroksoanioni dingtanga. Duk aro jajrenga donggenchimoba Krismas aro Bilsu Gitalni ka’srokanian uarangko pindapaia. Mongsongbatede Krismas aro Bilsu Gital somoirangode saksa sakgipinna ka’sae on’anian gipin jaksramani aro mandeni gipin dakanirangnaba batangpila. C Flint indine agana, “On’e galna man’jabatgipa kamde ka’saanian ong’aia. On’atoba ka’saanikode pangnan on’pilrongaia.” Ian angni golporangni katta ba messageba ong’china. Ia golporangko anga angni ma’gipa Bimoni K Marak aro pagipa Wellington D Sangmako gisik ra’e seaha, jemangnan anga chu’onga gita angni janggi tanganina mitelpil’aniko on’rikna man’jaha gita anga nikronga. Ia golporangchi uamangna angni mitelpil’aniko anga parape’enga.

Saoba saksa indine agana, “December jao golporangko gipinrangna on’na gisik ra’aniko on’anina, hai Isolko mitelna.” Oe, gisik ra’na man’aniba Isolni on’gimin boksis ong’a, jekon chu’ongana bate an’ching Krismas aro Bilsu Gital somoirango jakkala.

Cunningham K Marak
Tura, Bonepa A’tila
West Garo Hills
Meghalaya

21 758
26.09.11
AS 11

ong'aiama?" "Kasha, an'chingde atchion papo atchia. Na'a chonoba na'a papon atchia. An'ching manderangde darangba namgipa dongja. Parake pap ka'jaoba an'ching mandeni nikgijao namgija chanchiode uaba pap ong'aia. Atchiao ba'kapgipa papnasa Isol Uni depante Jisuko an'chingna sichake jokatchina watataha. Jisuo bebera'ode an'ching a'gilsako sioba, norokchi re'jawaha. Jokaignok. Jisuchi salgiona re'gnok." ine ma'gipa aganaha. "Ai angade Jisuo bebera'gen. Angaba salgichi re'na ska." ine Kasha aganaha. "Ai aro mingsa – angna Krismasode Jisuni noksako ra'bone. Aro, ai, maikai ka'onanggija dakgen? Anga ka'onangtaiode Jisu namnikjawakon. Jojong basakobade ka'onangataia," ine Kasha agantaiaha. Ma'gipa aganaha, "An'chingde ka'ode nangaigen. Pangnan an'chingo namararade dongja. Na'a sakoba ka'onangode uoba kema bi'bo aro Jisuoba kema bi'bo, unode kema wataigen. Aro, ka'onangako ka'sinatna bi'na nanggen. Jojong nang'ko ka'onangatode, na'a biko kema ka'na nanggen. Unosa Jisuba nang'ko kema ka'gen" "Ai, anga ma'sijok da'ode. Jisuan angko dakchakaigen." ine Kasha aganon, ma'gipa aganaha, "Na'a da'ode poraina man'engjok. Jisu dakchakchina Sastroko poraie Isolo bi'rongbo." "Oe, ai," ine Kasha aganaha. Kasha chonengoba ia bilsa Krismas manianide Kashana orto gnanggipa Krismas ong'gnok. "Mitela, Jisu." Ine Kasha aganaha. "Oe, anga kal'anirangkoba namnikaia. Cholarangkoba man'a skaia. Jisu anga bi'sa ong'kuenga ine uia. Iarangko man'na skana Jisu ka'onangjawa," ine Kasha chanchiengachim. Unon ma'gipa aganaha, "Ia Krismas maniaode, Kasha ai, Jisukoba okamatna. An'ching Bina dintangmancha boksisko iachangde on'gen. Nang'ni ka'tongko." "Oh, ai, nambegnok. Angni ka'tongo anga Jisuko dongnok. Dudkoba ringgnok. Laisakkoba cha'gnok.

Te'rikkoba cha'gnok. Jojongkoba dokjawaha," ine Kasha aganaha. "Re'babo Kristo Jisu, Amen," ine ma'gipa aganaha.

Krismasni Golporang 2

Beng'blokrang Jripengaha

Da'a bilside chibolrangoba beng'blok mikoakon bang'e knajajok. Bengbong mikoakode knaroroangsrangja'engjok. Mikka wakarioba beng'blokkon nikna man'angjaengjok. Bengbong aro beng'blok kusimtoksan ong'ja, beng'blok, wapek, bengbong chongiparangkoba nikangjaengjok. Uarang gimaroroangengaha. Songo mande jelbae beng'blok roronggipa chibolrangan bon'angengaha aro chibilokrangba komiangengahai gimin ong'akon. Ia beng'blokni golporangko songni pante sakbri, Tongkam, Mingsing, Pajim aro Kangrak indake betbetangengachim. "Skango angni chonmitingode ching nok ka'ma ramao chibol dakgipaon, mikka wabajokode walgimik gimik ka'supile bengbong aro beng'blokrang mikorongachim. Da'ode chibolba dapa gita dakjok aro tong'sakode skul nok rikjok. Maidake beng'blokrang tanggen?" ine Tongkam ripengtangrangna aganengachim. "Agrepile manderangba beng'blokrangko doke gala aro bengbongrangkode dokeba cha'ade," ine Mingsing aganaha. "Chingni pul ge'gipa mitino, pul pikani a'kol gop dakgipao anga beng'blok tangsek dake dal'gipako nape dongako nikenga," ine Pajimba aganaha. "Hai, an'ching beng'blokrangko am'ramemung bisongna chibol gitalko am'e on'a. Sin'kariode beng'blokrangde tusia. Mikka wabajokosa mikraktaienba, bitchi chi'taignok. Badita man'a

beng'blokrangko am'bae chibolsamo a'kol cho'e
 bisongko gope done, ding'kario mikrakpilo bitchi chi'ako
 nina," ine Kangrakba aganpaaha. "Skul nok ki'sangode chibol
 aditan dongkuenga, hai an'ching songni me'apa
 me'chikmarango aganchengemung dakpana namnikgipa
 panterara chibolko cho'bile chimik donggipako uchi cho'e
 watna," ine Tongkamni aganon, sakgittamba namnikpaaha.
 Songni nokni manderangna janape nion, uamangba
 panterangni aganako namnike ra'chakpaaha aro poraigiparang
 chuti ong'tokengani gimin knal pringoni kam ka'tokna tik
 ka'tokaha. Tongkam me'aparangna aganaha, "Chinga
 panterangan bang'beani gimin, na'songde sambao asonge
 nitimaibo aro chingna skiroroataibo." Pring gipino, panterang
 aro me'aparangba kodal aro gitichirangko ra'e aro
 me'chikmarangara samrangko chibolo ge'na atterangkoba ra'e
 re'batokaha. Salgimik gong'e ka'tokaha, a'arangko
 cho'bilbilaha, me'chikmarang samsirangko bake ge'ataha aro
 guk jo'ongrang rona namgipa pul, samrangkoba a'samo,
 rikamrango aro chibol jatchirangoba ge'aha, jedakode
 beng'blokrang mikrakpilon guk aro jo'ongrangko cha'na
 man'gen. Sambao chimik aro chibol chi joksalna
 man'gijagiparangkoba salsagipao panterang tarigimin
 chibolona chikare kae tarie ra'angaha. Salgittammangni
 ja'manode chibol tarigipaona chirang ka'sine gabaengaha.
 Tongkam pringo re'ange nion chi dobaako nikon songni
 manderangna kobor on'na katbapilaha. "An'tangtangni
 beng'blok nike dongipako bil'e ra'batokbo, chibolo donna,"
 ine me'apa saksa aganataha. Mang kolgrikmang
 beng'blokrangko rim'bae chibolo dape donetokaha. Chi man'e
 samsirangba silbatokengahachim. Pajimpa aganaha, "Kariode
 mikka wabajokode beng'blokrang kusi ong'e mikognok.

Bengbongrangkoba rim'e cha'na on'na nangja. An'ching song niam dakna nanggen. Bitchi chi'e alaring jeloba darangba so'otna nangja," ine aganon tom'bagipa mande jinma pilakan namnike ra'chakpaaha. Chibolkoba wa'achi bera peng'e donaha. Chibolo je pul bolrang, mi aro me'surangna satgipa samrangko satna beng'tokaha. "Kariode gimaenggipa beng'blokrangko man'pilgnok. Beng'blokrang jrip dongjawaha, maina beng'blokrangba an'chingni bakan ong'a," ine Mingsing pagipa aganaha. Unon tom'bagipa mande jinmaan, "Merry Christmas, beng'blokrang," ine skaniko on'angtokaha. Tusienggipa beng'blokrangnade kari April-May jarangosa Krismas somoi ong'gen. Unosa songni jaksrame ka'sagipa manderangna kusi ong'e namgipa Krismasni skaniko ra'baskagen. Unode wal ka'sinjawaha. Beng'blok gekakanan gimikchin an'saognok.

Krismasni golporang 3

Wanti Me'diksa

Sin'karini somoirangode A'chikrangni nokrangode attamo pura su'ode, ka'tong gisik ka'sroka. Minil pita, jakkep aro wanti sakkin gatani bibarangsa gingtingona balbaa. Krismas sepangbaanikoba mesoka. Patchi ma'gipaba minil pita, jakkep aro wanti gatna changbea. Patchi adagipa sakgni Korak aro Parakan pura su'e on'timrongachim. December jani a'bachengarangaoni Patchi ma'gipa Patchiko rime bazaarchiko gur bitin, sipin aro minilrangko ra'e donna re'rongachim. Sipinrangko bree su'srange jabol gale salo rame ran'ate donrongachim. Minil pitakode, chinini pal gur baksasa stap

stap toptope dakrongachim. “Ai, na’a minil pita dakode, anga angni ripeng Simchiknaba ra’angtaigenne,” ine Patchi aganaha. Simchikma’angde gittim damsao dongachim. Sonibar salo ma’gipa depanterangni pura su’e on’ako gur baksa minil pita tariaha. E’salo ge kolatchiko tope, ma’gipa aganaha, “Patchi, iakai, minil pita, nang ripengna ra’angbo.” Patchi minil pitako jolao ra’e re’angaha. Nokgnimangko batange a’bri ku’chothnangnangosachim Simchikma’angni nokde. Doangmitingo noksagipa nokko noksamgilgil re’pakna nangachim. Re’pakangmitingo Patchi nokningo bi’sarangni betbetako knaengachim. Saksa bi’sa aganengachim, “Ai, minil pita cha’na skachim. Da’sikariba an’chingde minil pita cha’manja.” Saksaba aganengachim, “Angade wanti cha’na ska. Mnisalo an’ching noksulrang simile wanti gatengachim. Ai, wanti cha’na ska.” Unon ma’gipa duk ong’e aganengachim, “Babarang, na’songni baba saa dipetdan, noko tangka dongja. Angni sanoba sanoba kam ka’nape man’ara merong aro me’sunan jenetenesa. Angaba dakede on’na skachim.” Ia golpo ka’arangko knae Patchi suk ong’jaha.

“Simchikma’angan an’tangtangba minil pitakora dake cha’aia. Anga ia nokdangna minil pita ra’bagipako on’sranggnokma,” ine Patchi dondike chanchiaha. Ja’mano bi’sarangna ka’sachakan gape, an’tangni Simchikma’angna ra’anggipa minil pitako ja’chokchime re’ange ua nokni babilisini do’gachol ning’o donangaha aro bi’sarang nikrikna skangan ta’rake ong’gone katbaaha. Nokona sokon Patchi ma’gipako, “Ai, na’a knalo me’dik bi’sao wanti gatna man’genma?” ine sing’on, ma’gipa “Maina?” ine sing’skaaha. Unon Patchi an’tangni nikbagimin obostarangko aganon, ma’gipaba ka’tong rakna man’jaha. Patchini adatangrang Korak aro Parakan pura su’e on’taiaha. “An’chingnaba ritbone,

ai,” ine Patchi aganaha. Un attamo Patchi wantiko e’salo kadepe ua nokdangona ra’angtaiaha. Do’gacholgita sruksruk donataina am’on, iachangde ma’gipa babilcioni ong’katchangbae nikdikaha. Patchi bi’sarangni ma’gipana wanti kadepako on’on, ma’gipa “Oh, mejaloba na’asa donangama?” ine sing’aha. Ma’gipa “Narim, Tarim, iakai na’songni sa’gre; re’babo,” ine okamataha. “Sawa donanga uko uijae chingade sa’gre donanga ine ra’aiaha.” ine ma’gipa aganon Narim aro Tarimba Patchini jakko rim’e, “Na’an chingni sa’gre,” ine kratchaa gnang aganaha. “Angade sa’gre ong’ja. Angko Patchi minga,” ine Patchi aganon, ma’gipaba aganaha, “Patchi, na’ade chingnade sa’gre gita ong’aha,” ine aganaha. “Chinga nang’ni kamko mamung saloba gualna man’jawaha.”

Oe, wanti katomsa aro minil tepsa. Indiba uko on’enggipa aro ra’chakenggiarangni ka’tong a’gilsak gita ong’e dal’a. On’ani aro ra’aniara ka’tong ning’onisa ong’a. Krismasni gisik naatani giminsa ong’baa. Jisuba an’tangko on’aha. Ra’chakanide an’chingosa.

Patchi ma’gipana aganaha, “Ai, Narim aro Tarimma’ang gita dakgiparang an’ching songo bang’en dongenggenkon. Uiode mitamrangkode skangoba dakchakna man’genchim. Anga, Simchik aro dada Korak dake, da’o Krismasna antigni dongmitingo sruksruk am’rame nina. Ai na’a wanti dakna neng’nikjawakonba? ” Ma’gipa aganaha, “An’chingni on’ade Jisuni an’chingna on’anioni besual rongsa gitaba ong’kuja. Maina neng’nikgen? Kangel manderangna on’e cha’e kusi ong’gipa Krismasko on’na anga kusi ong’a.”

Wal'tim Chaka

Sin'kari sokbaode manderang wal'tim chakna suk ong'nikbea. A'chik songrangode me'apa me'chikma, pante me'tra, bi'sa disa wal'tim chakna namnika. Taping pagipaba December a'bachengaon nokjanggilo sa'ra patalo wal'tim chakna nokkingko tin pine tariaha aro am'bolrangkoba bol ja'dil aro gantong dal'dalarangko chimonge dane donengachim. Taping pagipako dakchakaha. Joltango donggiparang Tapingma'ang nokona wal'timchakna re'barongachim. Waltingaonan wal'tim chake golpo ka'e rorongachim. Taping ma'gipa wal'tim chakgipa sambao chu'dap tarie ta'milangrang aro ta'bolchu aro uandake ta'a bipekrangko rite wal'tim chakgiparangna on'rongachim. Cha gitchak dakeba on'rongachim. Taping dokta nambregijarangko asongchakna am'pok ro'roe tarie donaha. Manderang wal'tim chake bal'eke ka'dinge rooba mande skako mitake aro gisik saani kattarangko aganede roskajachim. Tapingni ma'a paa jaksrama aro mande ska baksa melie dongrongachim. Uni giminan mande skaba uamangko namnikachim. Tapingba ma'a paa gitan chanchininge dakgipa aro dakchakninggipa ong'achim. Taping kariode matric ra'gnokchim. Adatang Rapingde, matric semanode Arts-ko ra'e BA pass ong'ode LLB ba Law degreeko ra'na chanchiengachim. Law pass ka'ani ja'mano, biade Cyber Law-ko poraina am'engachim. College joko computer-koba poraiengachim. Da'ororoni chasongo computerkoba kal'akna man'aia, tol'giparangba bang'a aro computer gita tangkako tol'e cha'gipa aro togigiparangba donga aro cha'ue dakgiparangba donga, Internet ong'kataonin bijuli gita (electronic) agangrikani aro badingchiwalanirangko

dakna man'ani gimin, Cyber law ba niamko tol'e cha'anirangko, sruksruk daksrue ra'anirangko, manderangni rakna man'ani bilrangko aro bikote man'mangiparangni kangani bilrangko poraie ukilrangna uibatani cholko on'genchim. Unan Rapingde ia Cyber Law-ko poraina skengachim. Computerni niam pe'anirangkoba unon poraijolgenchim.

Wal'tim chakmitingo manderang uni gimin Rapingo sing'e ra'tokengachim. "Bano ukora poraigen?" ine saksa me'apa sing'on, Raping aganchakaha, "Uikuja. Haida, Pune-ni Asian School of Cyber Laws ong'jaoba Banglore-o Cyber Law College-o ong'naba donga. Delhi aro Hyderabadoba donga." Gimikan Rapingni aganako gisik nange knatimaha. "Angade Engineer-na re'angbo inesa inachim. Bian ukosa nammnikana," ine Rapingpaba aganchapaha. Indakmitingo Rapingma minil rite ra'baaha. Wal'tim sambao tamilangba minengahachim. Ukoba gitчераo pake gimikni mikkango cha'china done on'aha. "Aiao, attamantian na'songkosa chingade kosto ka'beengjok. Chingni a'sel na'songsa man'dikpil'engjok," ine noksulni me'apa saksa aganaha. "Oejaode, da'ning," ine gimikan agantokaha. Unon Raping ma'gipa aganaha, "Aiao, man'dikja. Dake on'na kusi ong'bea. Na'song re'bajaode nokan sikdikdikpila. Ambin December kolgrikbrioba ianon cha ringe waljatchini giljachi re'chimaina." Pilakan namnike ku'mongpa'tokaha. Oe beben, indita manderangna cha dake, minil rite, ta'milang rite on'oba, Nokgipaan bon'changatja ina gita dakaia. Badita jawana bon'anga, saoba'an maikoba ra'baskaia. Ra'ping ma'gipa pagipama'angode bon'changanikode nikja. Dingtang dingtang dake Isolni patia'an sokbaaia. Maina, Raja uamangna aganchake ingen, "Na'simang Angni ia jongadarangoni

chonbatgipa saksana badita dakaha, uandake Angnan dakaha.”

Krismasni Golporang 5

Krismasni Montro aro Munni

Krismas sepangba'ora Dimrikma'angni songode taria'an ching'chipchipaijok. Bolrango aro nokrango ching'ata'an gaptokaijok. Gilja nokkon tariakode nitobate nikjok. Attamo Krismas gitrangko ring'roroe Dimrik aro bini ripengrang songko niroroe re'dule taria nitoarangko niroroe rorongachim. Gitchak, tangsek, rimit dakgipa light bulbrangko sringtokani gimin gimikchin teng'chipchiptokaiaha. Saobarangde indake gilja nokrango teng'atade koros-sa ong'aia aro Kristianna kraja ine songni mondolini pamongko ka'oba nangtokaha. Indiba, pamong Isolo bi'esa iarangko dakani gimin matnanggiarang dongoba gisik sajaha. Da'sikarini obostako bia gisik ra'atengachim.

December-ni kolgrikbri attampango pante saksa aro me'apa dambe saksa chu pekmilange gilja nokona re'bae dongeachim. Unomiting pamongba gilja nokona, waljatchini gilja ka'ani bidingo nirokna re'baahachim. Pante aro dambe me'apa pamongko nikjachim. Uamang asonge saksa sakgipinmung indine agangrikengachim. “Aiao, nang'koba gilja noko nikna ka'dongjachim. Maikaisa sokbajok?” ine pante dambe me'apako sing'aha. Me'apa aganchakaha, “Gilja nok mikkango teng'chipchipako nikaton, il'lip il'lip dake angko okamatenga gita angade daknikaijok. Mejaonin re'banade ska, pa'manja. Bijuli teng'suako nikon, ang' ja'arangba cheng'a gita, ku'chilrang git ring'enga gita aro ka'tongon ka'sroka gita

dakaijok, angade chake nioba chaknan man'jajok. Gilja nokchin re'bana skaijok. Iano asongon, angni jik desa gisiko nabaa. Bia ka'chengaoni chu ringbebea angaba. Attamantin botol gni gni angni chu ra'e ringgipa tangkachide, bilsu gimiko nokko rikna a'bachengna man'pilgnokchim. Uko chanchiesa grapnaba skenga, " ine ka'siksike grapaha. Pante adita jrip dakani ja'mano aganskaaha, "Angade skangode chu ringjachim. Giljaba re'ronga. Angko ka'gipa me'chik togiaonin, hit dare, giljaba re'na sikjoljajok. Indiba da'alde giticham salrangko gisik ra'e, light ching'ako ja'rike gilja ning'chi napana skaijok. da'o dikdiksa giljao asonge chanchiora, haida ua me'chikkode angnade sesojakon. Bebegita biko ra'oba, angan duk ong'genchim. Biara angna tik ong'jawachim ingipa gisikona tik dake sokbaa. Gisiko da'osa srang dakanga. Aiao, chuba ringjawaha. Angnaba ka'sapagipa me'chikrangba donga. Jora ripeng ong'genode bisongonikon basegen," "Aiao, nambejok mosa. Ramram samsam ka'saana kimoba bang'aan duk ong'tokenga. Angade an'tang nokna jikna dena simsakja'esa duk ong'e grapenga."

Uamangni golpo ka'ako knatime pamong sruk sruk nikatgija re'pilangaha. Isolan ia teng'atanirangchi mande sakgniko dingtangatahanina Isolko pamong mitelaha.

Waljatchini giljao skiprakanio pamong mikkang rongchinge Sastroko skiprakaha. Uan Jisuni Atchiani Sal ong'oba, pamongni aganani pangchakaniara "Uni gimin pil'e Jisu uamangna agane inaha, 'Angan a'gilsakni seng'a; angko ja'rikgipa andalao re'rurajawa, indiba janggini seng'ako man'gen.'" Pamong bamgope ua pante aro me'apa dambeko biko grongatanina Nokgipako mitelaha.

"Aro Jisu uamangna aganaha, Donni ning'o ba tuchakani ning'o donna ine tochriko ra'baama? Gasani kosako

donna ine ra'bjama? Maina parapena ong'jaode, donnua mamingba dongja, aro seng'aona re'bana ong'jaode donnua mamungba dongja." "Janggiko Isolona an'pilatanian Krismasni Montro aro Munnni ong'a," ine pamong aganchotaha.

Krismasni Golporang 6

Ambina Mi Palsa

Ia songode Krismas cha'ani salon salni gilja matchote jinma mi cha'rongachim. Manderang, me'apa, me'chikma gimikan pringnin song'na channa gilja nok patalona re'barongachim. Gekgak gekgak kusi ong'e golpo ka'e song'tok chantokachim. Bandik ma'gipapa bini noksul Temchi ma'gipamung song'na re'batokaha. Bandik aro Temchiba ma'gipama'angko ja'rikbaaha. Giljana skang kam matchote aue miksue manderang giljachina re'pilangaha. Mondolini pamongara songni nokni manderangko sawa mai ong'enga uarangko sandie dakchakrongachim aro me'chikmarangkoba ripengska duk ong'giparangko sandie Krismas salo cha'gipaoniko mi bijakrangko tikatpachina aganrongachim.

Bandik ma'gipa ma'angni gittimo Krismas salna skang jasa dongo Tokkampa saa bilonge hospitalo dongengachim. Suntak jonggipaba November jao sagitike siachim. Suntak pa aro ma unan kalime song'a chanachi re'bapajachim.

Mi bijakko chu'ongen song'a chanachim. Cha'na skangan saoba noktangtango sae re'bana man'gijagiparangna chame donchengaha. Bandikma aro Temchima Tokkam ma'ang nodangna aro Suntak ma'ang nokdangna mi

bijakrangko chame donchengaha. Unon Bandik ma'gipana aganaha, "Ai, an'ching gittimni ong'jaoba ang' ripeng Berena-ni ambiba saa bilongengachim. Bisongba re'bana man'jakon, Hai, ai, bisongnaba on'atna. Anga Temchiming ra'e on'angaina." Bandik ma'gipaba Temchi ma'gipako singgrike namnike Berena ma'angnaba tikatpaaha.

Manderang dintang dintang duk ong'gipa nokdangrangna aro sae dongenggipa nokdangrangna dakchakatpana man'ahana kusi ong'tokaha. Man'sogiparangba on'atarangko mitele ra'rikaha aro an'tangtangni dukni obostarangko chanchining'e dakanina mikchian raktokjajok.

Bandikma Temchimana aganaha, "Krismas salara ale cha'anisan ong'aija. Duk man'enggiparangko dakchaknaba an'chingna cholkode on'a. Aiao da'nang saa donggiparangde baditan man'dikenggen." Unon Temchima aganskaaha, "An'chingan, mondolini songni manderangan karini su'ua gita ong'a. An'chingni Kaman namjaode, su'uaniba dongjawa. Karide nama indiba karini su'ua griahaode, uko maichi su'uattaigen. Hai, an'chingde ia su'uaniko gimaatjanamo, Bandikma?" Bandikma gakgue ku'mongpaaha.

Krismasni Golporang 7

Buringrang Grapa

Nokit aro Mikkit ma'ang song sambaode bilsiantian adita song rikamo donggipa manderang a'ba o'e game cha'rongachim. Song salgro aro salaramchi a'brirang donga. A'brirang chubreja aro so'onchoke silbea. A'bri ka'marang gita chiringba dilgni jokangenga. Salgro a'brini ja'rekjoljol buring

dikgipa dongachim. Ukode songni manderang a'ba o'e game cha'na on'jachim. Huro, makkre, mapil, menggo buring bijare, matchok, balgitchak aro rokomanti do'orangni dongramsang on'achim ia buringde. Ia buringonikode sikar ka'e cha'naba songni manderang on'jachim. Buringo do'o mat aro matburingrangsang on'ja bang'a gamchatgipa sam bol aro pulrangba dongachim. Songni manderang ia buringko ka'sae jakkala aro do'o mat aro matburingrangko nosto ka'ja.

Salsao Nokit pagipaming ia buring sambako dakanggipa rama gita gario re'bamitingo makkre dolsaba ramako batsotangengachim. Chonaoni dal'aona mang chikking mang donga. Gari re'baako nike dal'batgipa makkre ma'gipa on'jaode ambigipa on'na nanga, chonbatgipa makkre bi'sako gipake rama chatchio garichiko nitate asonge dongaha. Mangsa mangsa batsotman'angani jamano ua makkre bimaba garichiko nipilgija batsotangaha. "Baba, ia makkre bimade indakpile gipinrangna ka'sara. Janggi tangko on'chakenga gita nikpilaha bikode." ine Nokit pagipana aganaha. "Matburunrangba bilongen ka'sana changa. An'ching manderang uibatgiparang on'e, uarangko ka'sae jakkalna nanga. Do'o ba matburung jatsa gimajokode, uarangde gimakamaignok. Gimajokode ua jatkode a'gilsako man'taijawaha. Huroba komiangengaha. An'chingni buringosan mikoako knaaengjok, mikoakon knajaengjok. . Do'kua, do'grik aro do'mesalkoba nikangjaengjok. Matburing aro do'orangni bon'anga gimaangako champengnade mandeosa on'a. An'chingsa uarangko tange rakkina nanggen." Indake golpo ka'e re'angon, song rikamo donggipa dolsa manderang ate ra'e ia songni a'ba chana beng'gipa buringko o'patengako Nokit ma'ang paningsa nikataha. Unon Nokit pagipa garioni on'kate, "Oi, na'song mai dakchimenga. Ia buringkode songni manderang a'ba

cha'na on'ja. A'ba so'jokode bang'a matburing aro do'o, jo'ong gukrang signok. Na'song iakode a'ba cha'nabe," ine chrikaton, ua manderangoni saksa, "Nangpani a'a kanga gita nikama," ine aganchake o'patangaiaha.

Unon pagipa aganaha, "Hai, Nokit gario gadobo, songni manderangko ta'rake agane ia manderangko dondikatna nanggen. Manijaode Boro Saheb (DC) aro Forest-ni officer rangko agane bon ka'ate, a'kanganiko dakna nanggen." Manderang Nokit pagipani aganon ka'onangtokaha. Songni padot padot dakgipa mongsongkalgipa manderang re'ange aganoba a'ba o'na tarienggipa manderang manijaha. Unon Mikkit pagipa aganaha, "An'ching Boro Saheb-ko gronge aro Forest-ni dalgiparangko gronge a'kangna niam dake ra'na re'srangna. Ia manderangni kamde namjajok. Do'o mat matburingrang bang'en signok aro nosto ong'gnok. Da'o December ong'aienga. Bisong March jaosa soba sogen." Unon songni padot dake dilgiparang Boro Saheb aro Forest aro Wildlife office-ona re'ange dorgasto galna ia salon re'na tik ka'aha. Boro saheb Forest aro Wildlife officerangni dal'batgiparangna chiti watate ong'a obostako niechina aganataha. Antisani jamano a'bri wilwilao donggipa buringko darangba dangtapna aro nosto ka'jachina seaniko on'ataha aro unbaksana songni manderangna buringrangko a'kange nosto ka'gija rakkina bilko on'ataha. Ge'etani chitiko man'soe manderang ku'si ong'tokaha. Song rikamo donggipa manderangba o'patako dontongjok. A'ba cha'na pajajok.

Ian ku'grigipa matburingrangna aro do'o matrangna Krismasni namgipa kobor aro boksisi ong'aha. Unbaksaba, songni manderang buring rikamjoljol chirore, cha'gro, miskuri, ambare segin, mandal aro angkil bolrang aro do'o bi'sarangni bitchil cha'na namnikgipa pulrang jekai genda aro marigold,

megaru dakgipa samsirangko ge'naba tik ka'aha. March-April
jolrango man'a dipat chara aro bol bi'sarangko chimonge
bolrangkode ge'na aro pulrangni bitchilrangkode a'a
chobakbake da'on sate donna ine tik ka'tokaha. Ia kamrangchin
manderang burinrangna aro uno songdonggiparangna
Krismasni namgipa skani baksa tom'tomanikoba on'jolangaha.

Krismasni Golporang 8

Gualna Man'gijagipa Krismas

Titim aro Baltim adasa songni collegeo PU Science-
ko poraiengachim. Dakrongbaenga gita Krismas bilsil gitalna
chu'onga gita college chuti watachim. Uamangni collegeo song
chel'arangoni re'bae nok bhara ra'e donggiparangba
dongachim. Mitamde hostelo dongachim. Song chel'aoni
re'bagiparangoni sakgni Dapen aro Alsude chutimitingoba
songtangtangchi re'angjawana. February jao bilsini porika
ong'engani gimin poraina nanggen ine aganaha.

Unon Titim pagipa aro ma'gipana aganaha, "Ai, baba,
da'sikariba Dapen aro Alsude Krismas-o noktangchi re'angja.
Nokgiparangba segipani songchi Krismas manina
re'angskaemung, bisongde sikdikdik dakniktokbeahana.
Bilsiantin bilsil bon'o, bi'sarang porika matchotode
nokgiparang migital cha'na aro Krismas aro Bilsil gital manina
re'angrongana. Ai, baba, an'chingon kuturi dal'a ge'sa indinan
dongaenga. Bilsil gital maniaona kingking dongkan. Dapen
aro Alsuko aganbaboma?" Ma'gipa aganaha, "Aiao da'nang,
baditan saksan ong'tokenggnok bisongde. Uiode angan
rimatdeaigenchim. Noktangtango maniako aro ma'a paako

basikan gisik ra'atenggen. Uchi uchi na'songming re'rame kusi ong'naba man'gen. Songni Krismas alakoba cha'manpagenchim da'ning. Hai rimbabo hai, Krismas aro bilsigitalo ianon dongkan. Nang'paba namnikpaaiaakonba mo, Titim-pa?" Titimpa, "Aiao rimbaboda," ine aganaha.

A'bachengode Dapen aro Alsu man'dikata gita dakna kene kratcha'nikachim. Indiba Titim aro Baltim mol'molani gimin aro bi'sarangba namen namgipa aro mande ra'na sapgiparang ong'ani gimin. Dapen aro Alsu kusi ong'en re'angaiaha.

Uamangko noktang gita nokdangni manderang jakkalaha. Minil pita aro jakkep dakoba Alsu aro Dapenba dakchakparongachim. Krismas ong'nasiani attamo Dapen babilsona re'bae Titim ma'gipani kam ka'a sepango chadenge, "Ajong, da'alde anga bijak song'e ninane" ine bi'aha. An'tangan Alsu baksa koros ka'na re'ange do'o ra'bae jal'ik daldalgipaming (capsicum/bell pepper) song'aha. Attamo miattamko Isolo bi'e cha'dilahaon, Dapen Isolo bi'na on'china bi'aha aro ua nokdangkoba miteljolaha. Gimikan Dapen-ni bijak song'ako tonike cha'tokaha aro miteltokaha aro kal'akgrike ka'dingtokaha.

Git ring'susarangchi, dakmesokarangchi aro ramao Krismas Carol ring'arangchi Dapen aro Alsukoba rimparongaha. Pilakna bate waljatchini giljao chongipa me'a bi'sa sakgnini namprete "Special Krismas," ba "Dingtangmancha Krismas" ingipako ring'ako namnikbataha, maina Dapen aro Alsunade da'a bilsigitalo Krismasan dingtangmanchagipa Krismas ong'bebeaha. Gilja nokon bamgope sakgnian Titim, Baltim aro uamangni nokdangko ka'tongoni mitelaha. Da'sikarini sikdikdikgipa Krismasko uamang gualaha aro a'gilsakode

indakpile namgiparangba donga ine uiaha. Ia Krismas Dapen aro Alsunasan ong'ja indiba Titimni nokdangnaba katchabatsranggipa aro gualna man'jabatgipa Krismas ong'aha. Krismas pringo saksa sakgipinna boksirangko on'grikon Dapen aro Alsuba an'tangtangni mitelaniko cake dal'ako ra'bae tableo donee mesokaha. Gimikan kusi ong'bee saksa sakgipinko "Merry Christmas" ine skaniko on'grikaha. Jisu an'tangan iamangni gisepo dongenga gita sakantian nikpilaha, maina kusi ong'ako aganan ampiljaha. Dol gninan ia Krismas-an nambatsranggiparangoni nambatsranggipa ong'aiaha. Jisu uamang baksa dongchongmotaha, maina, "Anga okkriachim, aro na'simang angna cha'na on'naha. Anga ringna sikachim aro na'simang angna ringna on'aha aro anga a'gitalchim aro na'simang angko nokchakaha." Ian kakket ong'aha.

Krismasni Golporang 9

Na'a Saksan Ong'ja

Minjo poraia matchote songtangona re'bapilaha aro sorkari kam ka'gija, sorkari ong'gijagipa kamrango tangkako jakkalskana miksongskaengachim. Minjo graduate ong'ani jamano Business Economics ingipako poraidapna miksonge New Delhi-ni College gesaona re'ange poraidapangaha, maina bini dake cha'na miksonggipana ia poraidapani dakchakani ong'genchim. Ia poraidapakosa matchote ua da'o songona re'bapilaha. Pagipa sorkari kam ka'ja, indiba songtango bolni biterang bang'beani gimin uarangko bitchi sepe, jo'ong siatna rite tarigimin ra'chakani botol dal'dalgiparango chipe sepang jolrangni dal'dalgipa biaprango donggipa Company-rangona

watatrangachim. Ianan uamango karkana dongachim. Karkanako tange rakkina pagipa dal'dalgipa baganrangko dake, gomila, letchu, kakji, jambura, peach ba indakgiparangko ge'achim. Unbaksaba songni manderangonikoba bree, manderangni janggi tangani cholkoba nambatatachim.

Minjo songtangona poraie re'bapilon, dingtang dingtang janggi tangani cholrangko dake on'na miksongachim. Songona sokbaon, Minjo ma'apaako nike kusi ong'eoba, maiaba kusi ong'gijani dongenga gita noko nikaha. Unon Minjo pagipako, "Maiba ong'ama?" ine sing'on, pagipa duk ong'bea gnan, "An'ching Karkanako chipna nangjok. Gomila, kakji, peach aro gipin biteni bolrang saa rok man'e bite nangja. Peach boloba bijako dal'dale gitchake topa dakgipa bang'e ong'katbia. Gomila bolrangoba bite nangbaon chonchongipa tangsekgipa tampi dakgipa nosto ka'bea. Gomila aro letchu bipangrangba sel'ja gita dake bitean nangja. Da'on biterangde nangemung raani (harvesting) ong'engachim. Ge'gipa, gamgiparangde maidaken cholignok Krismas –na jagittamsan dongaijok. An'chingba business-an da'a bilside cholijsaha. Ge'gipa gamgiparangnasa duk ong'enga angade," ine Minjo pagipa aganaha. Unon Minjo an'tangni kuturichi napange ja'sku dipane Nokgipa maikoba dakna gisik on'china bi'aha, aro unbaksana an'tangni poraie skia man'giminko jakkalna on'chinaba bi'jolaha. Unon Minjo-ni gisikona ta'rake manderangna tangka man'atani cholde ta'rake bibalgipa pulrangko ge'e Krismas aro Bilsi gital somoirango uarangko palatna chanchiaha. Minjo a'palona ong'katbae pagipako aganaha, "Baba, knalo meetingna tom'atbo. Anga uamang baksa agangrikna" ine Minjo pagipana aganon, pagipa namnikaha.

Okamaona tom'battokon, Minjo aganaha, "Bolni

biterang rok man'e da'a bilside nangjae na'simangni kamaigniko nosto ka'aha. Da'o pilakan Krismas aro Bilsi gitalna maiko cha'dilgen ine duk ong'tokenga. Da'o Krismas aro Bilsi gitalode manderang pulrangko bilongen ra'a, unigimin an'ching ta'rake bibalgipa pulrangko ge'na. Unbaksaba mitam pulrangkode baldaldalkoba ran'gimin sigimin pulrang gita nikaia jekai helichrysum aro statice. Uarangkoba tarie palchapna. Pul jerangkon an'ching siate ran'ate palgenchim uaragara Dahlia dalgipa, Zinnia, Calendula, Cosmos aro indakgiparang. Da'o jagittam dongenga Krismas-na, an'ching somoi man'kugen, uarangko ge'na. Unbaksaba altue channinggipa aro pul balninggiparangkoba me'dikrango ge'e palna. Ia indakgiparagonide Impatiens-ba ong'a. Ia pulan rokom rokom rong aro jatrang donga." Re'bagipa pilakan ia dintang cholko niktaianina Minjoko mitelon, gisiktangtango jajaaniba dongaha. Uko nike Minjo uamango sing'on, saksa me'apa chakate, "Chingade pulrangkoba ran'ate, siate, nikkuja, changjawakon aro bibal gitalrangba akani ja'manon bikan sikrepaigenkon," ine aganaha. Minjo aganaha, "Jajrengnabe anga skigen. Pul bibalrangko ran'ate siatnade na'simang jutani bakosrango ba, juta ra'ani lekani bakos dongjaode lekka chatgipako bakos tarie an'cheng simit ba se'engipa an'cheng baksana borax bak gniko on'e, bakos kamao inch gnimangna chate on'e, pul bijakrangko gale, pulko an'chengchipak chikkipate, pulni pul janggilkos kosakchipak done, an'cheng aro borax bringiminko ka'sine pulni bibal dingprako pudape pudape, pul pripkujana kingking pudape, andalgipa aro ran'gipa biapo anti gni, anti gittamna done, sie ran'joko, ra'ode an'chengko ka'sine dokpronge gale tariaia. Dahliakode bibalko songgoke biap ran'ao doneba ran'ataia."

Jagni jagittamo manderang gong'e ge'bebeaha. Ran'atgipa sigimin pulrangko aro helichrysium aro statice sinuatako indinan ran'aia gita nikanigimin dintang kadime uarangkoba tariaha. Manderang Krismas aro Bilsil gitalna skangan bia donggiparangde pulrangko seksek bildang dake ra'aha. Krismas aro Bilsil gitalnaba palnangtokaha. Manderang Krismas aro Bilsil gitalo diljaha aro nokdangtangtangko namen cha'dilaha.

Minjo kuturitango iarangko dakna gisik on'anina Nokgipako mitelaha. Mamingkoba dakna skangba, Isolo pakwatode, Isol uming dongchongmota ine Minjo ma'siaha. "Na'a saksan ong'ja, Minjo, Anga nang baksa donga" ine Isolni ku'akchakaniko Isol pe'ja ineba ua uiaha. Changsatai ua Nokgipako miteltaiaha.

Smasni Golporang 10

Chola Gital

Krismas sokbaengjokode Pitchi aro Tikchi abisa, saksa bilsil sni aro saksa bilsil bongani bi'sarang, chola gital man'na kusi ong'soronga. Bilsil bijangchirango gisepo chola gital ra'e on'oba, Krismaso chola gital man'na kusi ong'bata. Adatang Pachengba jean da'o bilsil chikking ong'engachim pagipana aganaha, "Baba, anga ia bilsil ba'ra gital ra'ode bazaarchi re'ange an'tangsa nie bregenne. Meja bazaar re'ango 'jean' nama sokbaako nikenga. Bigilni jacketrangba nama nama sokbaa nikenga." "Ra, ang' depanteba pante sokbaengjok. Ma'a paaming tunaba kratcha'engjok da'ode. Kuturiba dintang nangjok. An'tang ra'oba ong'gijarangko brebroke

galnabe. Nichengesa brebo.” ine pagipa aganaha. “Angade da’ororo an’ching songona gital sokbagipa maiaba “Pepe Jeans” ingipakosa brena am’enga. Uasa namade. Bigilni jacket namako man’jaode angade Addidas ni chain (zip fastener) donggipa gisim dakgipa sweaterko ra’skagen.” ine Pacheng aganaha. “Aiao, na’song da’ororoni bi’sarangde komiakode ganja dakaigen koros ong’atbea” ine pagipa aganon, “Baba, Krismas-ni bilsio changsasan indaka namako breaaigenba,” ine Pacheng aganaha.

Bazaarchi pagipani tangka on’ako ra’e koros ka’na re’angbebeaha. Bazaaro re’duule ba’ra niengon, Pacheng bini ripeng Manchimboka dokan ge’sani mikkngo chadenge ra’giparangni ra’ako gisik nange nie dongengako nikataha. Apsan a’mangrong dakgipa jacketkon bilsu gittamnade ganako Manchimko nikengachim. Ua ba’ra chola gitalrangkoba ra’na ska gita dake nie dongengachim. Unon Pacheng Manchimni sambaona sokon, “Ba’ra ra’engama Manchim,” ine sing’eaha. Manchim gipinchiko nie jaja jiji dake, “Niesa roaenga” ine aganchakaha. Krismas-na antisasan dongengahani gimin, manderang, bi’sarang, pante-me’trarang bazaar-o koros ka’tokengachim. “Hai, angni ra’achi re’bo,” ine Pacheng Manchimko rim’angaha. Jacket ra’mitingo Manchimba mikboka gnang gnang niengachim, ra’nara tangka dongpajachim. Pacheng Manchim-ni ganenggipa jacketko maibakai nigak man’ora baobarangde uara a’kol donga, badiabarangde gin’na aro ning’o gangipa chola tee-shirtba napongasachim. Dikdiksa Pacheng ra’gija chanchia gita dongaha. Manchim pagipara mandeskaon kam ka’nape cha’gipa ong’ani gimin chola gitalrangko ra’e on’pana man’jachim. Gipinrangni on’gilarangkosa bi’sarangna on’ronga. Uko chanchie Pacheng, an’tangni Manchimko sing’arangna

kratcha'nikaha. Skulode Manchim man'gijade ong'ja aro Pachengming melibeachim. Pachengni ra'na sikgipa jacketara gong hajalsa batachim. Dam nom'kalgiparangnikode uchide king gittam man'gnok. Unon Pacheng chanchiaha, "Da'sikari jacket ra'giparangan gital dake dongkuaenga. Anga da'a bilsiba uarangkon gan'na man'aigen. Ia apsan damchin anga Manchimna longpen kingsa aro jacket kingsa ra'skagnok." Manchim ra'nade jechakbeoba, Pacheng ka'saesa on'engani gimin ra'aiaha aro kusi ong'beaha.

Krismas sokon pagipa Pachengni jacket gitcamko ganako nikoba, haida gitalko gankujaengakon inesa chanchiengachim. Krismas saloba giljachinaba Pacheng jacket gitcamkon gantaiaha. Unon pagipa Pachengko sing'aha, "Pacheng jacket gitalkora mainasa ganjaenga?" Pacheng jrip dongani ja'mano, "Baba, ia jacketrangan namkuengana gankuenga" ine aganchakaha. Unomiting Manchimba Pacheng baksa gilja re'na Pachengma'angchi re'baachim. Unon Manchim Pachengna aganaha, "Angade da'alde nang'ni jacket gital ra'gipakon gane re'bajok." Unon Pacheng pagipachiko kending kending njaha aro pagipa Pachengni kamko ma'siaha. "Hai Pacheng nokningchi re'ba" ine pagipa Pachengko nokningchi rimangon, ka'chana am'enga ine Pacheng kenachim. Unon pagipa Pachengko doktope aganaha, "Na'ara mainasa indakarangko aganja? Manchimna na'a ra'e on'na am'ode angara rakjawachimba. Ma'a paana kenpilesa na'ara jawana namaengama? Ma'a paade nama kamnade nang'kode ka'chajawa aro rakjawa. Isol an'chingnasan tangkako jakkalna patija, an'ching gitan gipinrang^{na}ba dakchakaniko ra'bana on'na. Knalo bazaarchi re'ange nang' namnikgipa jacketko ra'ebo," ine pagipa Pachengna tangkako on'taiaha.

Pacheng kusi ong'e Manchim baksa giljachi re'angaha.

Manchim kusi ong'e "Aiao, Pacheng angade nang'ni angna boksisi on'gipnade chotpilnan man'jawaha," ine aganon Pacheng aganaha, "Oh, chotna nangjawa, da'alde an'ching giljao Isolni an'chingna on'gipa dal'batgipa boksisi gimin knagen. Na'a name knatimbone." Pamongba 2 Korinthia 9:15 ko ra'e Jisuni atchiani gimin indine skiangaha, "Isolna mitela ong'china uni agana⁷ man'pilgija on'nani gimin." Oe, Isol an'chingna on'gipa nambatgipa bokside Jisu Kristoan ong'a. Ian Manchimni ka'tongko gisik nangatbeaha.

Krismasni Golporang 11

Ka'saan Dal'bata

"Krismas-ni ja'mano da'o Bilsu gital ong'gnok. Da'o baditaba salransan dongaijok bilsu bon'na." indine chanchie An'chirik gital bilsu re'baenggipani gimin gisiko niatengachim. Batanggimin salrangkoa gisko¹ nikatengachim.

Batanggimin salrangko niatpile An'chirik an'tangni janggi tangani nama namjako niatpilengachim. An'chirikara da'o college re'engachim aro ma'apaani saksa kamkam deme'chik. Ma'apaaba donggijagiparangde ong'ja aro chu'onga gitan nangako degipana on'achim. An'chirikni ma'apaa gam dongoba namgipa manderang ong'a, ka'sagipa aro dal'a dakgijagiparang ong'a. An'chirikkoba namen dal'ataha indiba basakoba An'chirik ripengskana, mandeskana chanchigijanirangba dongahakon.

Salsao An'chirik collegeo seng'gnang class dongani gimin sketbaket tariengachim. Indakmitingo bini ripeng Bonchi re'bae, "An'chirik anga nang'ko nangbeengachim," ine

aganon. An'chirik gisik nangbregija dake, "Angade da'o class dongane, ja'mano agangrikna re'baaibo," ine agane collegechi re'angaha. Bonchini suk ong'gija dake nirikakoba An'chirikde nikangjaha. Collegeoni jokbapilon Bonchi ma'gipa saani giminsa hospitalchi ra'na tangka dongjani gimin bi'chengna re'baachim ine ua uiaha aroba tangka dongjae hospitalchiba rimangjae ma'gipako man'rikjaha ineba uion An'chirik, "Anga Bonchina dikdiksa mangmang knachakode, ma'gipa sijawachim," ine chanchie duk ong'beaha.

Collegeo dakmesokani dongani gimin college skigiparang An'chirik ma'ang class-o nambata bara cholako gane re'bachina aganaton, An'chirik aro uni ripengrang name gane chine damsan re'angengachim. Unon obosta dongkalgijagipa ripengba bisongko srapeon, An'chirikni ripeng Bitji, "Aiao, Sinari, maidake cholako ganbajok," ine Sinari-ko inon gipin ripengrang ka'dinggrimaha. Sinari mamungkoba agangija mikkang gitchake dongaha. Unon An'chirik ka'dingpajaoba Sinarina maiba aganchape dakchakaniko on'na man'genchim, maina chola nama dongjae abitang Hinari-ni chola meligijakosa Sinari ganbaa ine An'chirikde uiachim. Niatpilon ripengtang Sinari-ko agane kratcha'aoniko jokatna bia mamingkoba dakjaha aro Sinaride kratchaen collegechi re'angpilsrangjaha ine gisiktango nikatpilengachim.

Salsao college re'bamitingo noksulni college re'rimska pante Logan minggipa An'chirik-ko srape collegeona damsan re'pana am'on, An'chirik uko namnikbregija gita niaha aro kusik on'na sikbregija gita dakon, Logan, "Nangko skia man'gipa dal'gipa nokdangoni me'chik (lady) ine anga chanchiachim, indiba na'a ua ong'ja" ine aganaha. Chanchiaton An'chirik an'tangni kamna kratchanikatbeaha aro indake Kristian ong'gijani

dakbewalrangko bang'en mesok man'enggnok. Haida sakobade chanchigija ka'dingstek man'engnaba dongjok aro gisik saatenggen ine An'chirik chanchiatpilengachim. An'tangni Kristian gita dakgijanaba kratchaaha.

Da'o re'baenggipa bilsiode anga ka'sagipa ong'na nanggen. Beberaa, ka'donga, ka'saa, ia minggitam donga aro iarangonin ka'saan dal'batgipa ong'a. "Ka'saako anga nokoni a'bachenggen. Ripengrang angona re'bae maikoba agana skode, anga knachakgen. Anga mandeskako uichenggijade bichal ka'jawa. Anga jaksrambatkalgipa onggnok. An'tangko anga 'lady' gita dakgen, agana skako chakchikgen aro sakgipinko angni mikkango chone nikatjawa aro chone ra'jawa" ine An'chirik namen gisiko raken chanchiaha. "Kristian jedake dakgenchim. Pangnana bate ka'saningkalgipa ong'na nanggen."

Krismasni Golporang 12

Nitogipa Krismas

Berena, Rapbi, Ringchi, Kobang, Chirim aro uamangni ripengrang Krismasko dingtange manina miksongaha. "Da'o skul chuti ong'ani gimin, hai, hospitalrangchi re'e badita donga uarangko am'rame nina. Noko sagipa dongode man'dikasan ongja, nokni manderangba duk man'a. Sawa hospital saksan ong'a, sawa sikdikdik ong'enga aro nitimgiparang dongama dongja, an'ching sandina," ine Berena aganaha. "Indakeming sandiani jamano mai dakgen?" ine Ringchi sing'aha. "Unon, an'ching sagipani nokdangrangkoba ia songni ong'ode sandie nina aro songni ong'gijagiparangkoba an'ching salanti re'e

ka'dimeatna. Pul aro cha'anirangkoba ra'na" ine Berena agantaiaha.

Sandie nion hospitalo sak kolatchi donga, unoni a'palchinide sakgnisan aro sakchikkingde ia antion jokengaha aro sakchikking gipinrang Krismas na antisa skang hospitaloni jokgnok. Dongrikgipa sakchikking onide sakgnisan bilongengachim. Berena aro uni ripengrang an'tangtangni chanchia gita pul aro cha'anirangko ra'e hospitalchina re'angaha. Bi'sarangko dongipao me'a bi'sa saksa sabeenga dongengachim. Berena uni sambao uni skoko dangtape, bini ra'anggipa pulko bini palang table sambao done, bangope Isolo bi'aha. Bi'sa tusiaoni mikrake Berenako nikdate, "Na'ara sa'grema?" ine nom'a ku'rangchi sing'on, "Anga sa'gre ong'ja, nang'ni ripengsa," ine Berena aganchakaha. Unomiting nurse re'bae, "Jon, hai sam ringbo," ine sam onjoljole, Berenana ka'sine, "Biade ma'apaa dongjajok. Ambitangmingasa dongenga," ine aganataha. Berena Jonna aganaha, "Anga salantin nang'ni namkujana kingking nang'ko nina re'bagen. Anga nang'ni ripeng" ine Berena ka'dimeataha. Uandake Berena uni ja'mano gipin sagiparangkoba grongna re'angaha. Berenani ripengrangba apsankon dakaha.

Krismas-na antisa dongon, sakchikkingna agrede gimikan hospitaloni jokangaha. Buchuma saksa bilonge sagipa dongachim aro Jonba jokkuja, saksa me'apakode nampiljawahakon ine aganengachim. Hospitalchi re'na tariengon, Berena nogipa Bikki-ba, "Angaba re'pana, abi," ine sing'aha. "Nono na'a chonenga, bilsa doksankua. Hospitalode sagiparangba bang'a, saobarangde sagiparangba saode be'en bimang nidika aro uamang ka'sae dakako nanga. Na'ade cholijawa" ine Berena aganon, Bikki, "Angaba pulkode

on'timgen" ine aganaha. Uni gimin Berena re'na skani gimin Bikki-koba rim'angaha. Hospital palang ge'anti sagipa sakantiona pul aro cha'ani baksa ra'e re'angon, sagiparang Berena aro uni ripengrangko nikna kusi ong'sotokaha. Sakantian ka'dingsmite rim'chaksoaha. Berenako nikon, Jon, "Sa'gre aro angni ripeng" ine aganaha. Jon-nan palang bon'chotgipao tuachim. Berena aro uni ripeng sakantian sagipa sakantiko jak rim'e sko rim'roke Isolo bi'e ka'dimeatani kattarangko aganon, sagipa gimikan kusi ong'e mesoktokaha. Unon Bikki abitangna rake aganaha, "Abi, anga nidikgiparangkode nikja. Sakantian nitoe. Abi, nitogipa manderangsa. Nidikgiparang bachi abi?" Unon sagiparangoni buchumabatgipa aganataha, "Nangni abitang aro bini ripengrangan chingko nitoataha. Chingo ka'dongani dongjao ka'dongataha. Bisongni hospitalona re'bae chingko nirokeo chinga janggi man'pilaha gita daknikaha. Oe, nang abi aro bini ripengrang chingnade Kristmasni sa'grerang ong'a." Bikki aganaha, "Ambi, na'aba nitobea."

Berena, Kobang, Rapbi, Ringchi, Chirim uamangnasan ong'ja, sak kolatchi hospitalo sagiparangnan ia Krismas-an nitogipa Krismas ong'aha. Sanenggipa nurserangba Berena aro uni ripengrangko niksoon ka'sroke kusi ong'e kam katokaha. Sakantinan nitogipa Krismas ong'aha.

SUMMARY OF SHORT STORIES – STORIES OF CHRISTMAS

1. **The Child of Love:-**

This is the story of a mother telling her six year old daughter Kasha about the meaning of Christmas and God's gift of His Child of love Jesus Christ to mankind as Saviour and how all the earthly gifts received are different from God's kind of Gift and the mother giving her daughter's heart as gift to Jesus.

2. **The Frogs are Silent:-**

The story narrates how due to the destruction of habitat and killing, the frogs are decreasing in number and their croaking are hardly heard, and how to save the frogs from destruction, four friends from the village took the initiative along with the village folks to create a new habitat for the diminishing frogs and how this attempt to save the frogs from extinction became successful.

3. **A Pot of Rice Flour Sesame steamed Cake:-**

This story is the story of one girl Patchi who along with her kind and generous mother took the steamed rice cakes and pithas from glutinous sticky rice to the poor and needy in the true essence of the Christmas spirit.

4. **Warming over the Winter Fire:-**

This is the story of a family who used to welcome

the neighbours and anyone to the warmth of the Fire Place built in the courtyard to keep warm during cold winter nights and of how this family generously served tea and traditional rice cakes and sweet potatoes, and entertained without any grudge and always with kindly smiles and of how, the blessings of God for the generosity never cease.

5. The Charm and Magic of Christmas:-

When the church, the vicinity and the homes were decorated with the lights, twinkling bubbles, glitzy tinsels, nobody could resist the beauty and the lovely shine these decorative lights emanated. The charm and magic of these bright beckoning lights touched the hearts of two drunkard strangers who found their ways inside the church and found peace and change of heart which only the light of Jesus could transform. This is how the story runs.

6. A Bowl of Rice for Grandma:-

The story narrates the warmth, generosity, care and concern of the church members of the village community headed by their pastor who remembered to share the portion from the community feast to those who were sick, their families, the needy and the downtrodden with the true message of Christian love and brotherhood.

7. The Call and Cry of the Wild:-

The tale recounts how the village folks resolved to save the wild animals and birds from the forests

of their hills when a section of the dwellers on the periphery of the village were hell-bent on destroying this habitat by jhum cultivation and how the village folks succeeded in foiling their attempt and saved the wild.

8. The Christmas They Could not forget:-

This is the story of two lonely students who had nobody to spend Christmas holidays with till their friends took them to their homes with the consent of their parents and who had a special Christmas in the midst of the loving and kindhearted family and which they could never forget.

9. You are not Alone:-

This is the story of Minjo who fresh from his graduation returned to the village only to find the orchards on which the family and the farmers depended, destroyed by the pests and the diseases but who, with the god given inspiration of trying alternative method of livelihood could make the Christmas memorable with the farmers, surviving for the Christmas and the New year.

10. The New Apparel:-


This is the story of Pacheng who, when having gone to the market to purchase a new trouser and a jacket for Christmas, found his friend having more need for the new clothes than him, and his gift being overshadowed by the eternal gift of God.

11. Kindness is Greater:-

When the New Year came, An'chirik looked back on her behaviour and dealing with other people and found herself wanting and she resolved to be kind to her friends and other people in the true Christian service.

12. Beautiful Christmas:-

Berena and her friends, instead of wantonly spending the Christmas holidays, resolved to have a special time with the sick in the hospital, comforting and caring for them in the true sense of the Christmas faith and belief. This is their story.



Rs. 20/-